

საქართველოს უზენაესი სასამართლოს მოსამართლის თანამდებობაზე ასარჩევად საქართველოს
პარლამენტისათვის წარსადგენი სამოსამართლო გამოცდილების მქონე
მოსამართლეობის კანდიდატის შეფასების ფორმა

მოსამართლეობის კანდიდატის ივერი აბაშიძის შეფასების შედეგი:

მოსამართლეობის კანდიდატის შეფასება კეთილსინდისიერების კრიტერიუმის მიხედვით		
მოსამართლეობის კანდიდატი არ აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი აკმაყოფილებს კეთილსინდისიერების კრიტერიუმს	☐	
მოსამართლეობის კანდიდატი სრულად აკმაყოფილებს კეთილსინდისიერების კრიტერიუმს	☒	
მოსამართლეობის კანდიდატის შეფასება კომპეტენტურობის კრიტერიუმის მიხედვით		
კრიტერიუმი	მიღებული ქულა	მაქსიმალური ქულა
სამართლის ნორმების ცოდნა	17	20
სამართლებრივი დასაბუთების უნარი და კომპეტენცია	18	20
წერის უნარი	18	20
ზეპირი კომუნიკაციის უნარი	14	15
პროფესიული თვისებები, მათ შორის, ქცევა სასამართლო დარბაზში	15	15
აკადემიური მიღწევები და პროფესიული წვრთნა	4	5
პროფესიული აქტივობები	4	5
ქულათა ჯამი	90	100

სახელი, გვარი:

ნიკოლოზ მარსაგიშვილი
თარიღი : 27. 06. 2025



საქართველოს იუსტიციის უმაღლესი საბჭოს მდივანი ნიკოლოზ მარსაგიშვილი

საქართველოს უზენაესი სასამართლოს მოსამართლის შერჩევის პროცედურაში მონაწილე კანდიდატის - ივერი აბაშიძის შეფასების დასაბუთება

საქართველოს იუსტიციის უმაღლესი საბჭოს 2025 წლის 10 აპრილის №1/35 განკარგულებით დაწყებული, უზენაესი სასამართლოს მოსამართლის თანამდებობაზე ასარჩევად საქართველოს პარლამენტისათვის წარსადგენი კანდიდატის შერჩევის პროცედურის ფარგლებში კანდიდატ ივერი აბაშიძის შეფასების დასაბუთების შედეგის პროცესში ვიხელმძღვანელო „საერთო სასამართლოების შესახებ“ საქართველოს ორგანული კანონის 34¹-ე მუხლის მე-11 პუნქტით დადგენილი წესით.

1. კანდიდატის შეფასება კეთილსინდისიერების კრიტერიუმის მახასიათებლების მიხედვით

კანდიდატი კეთილსინდისიერების კრიტერიუმით შეფასდა „საერთო სასამართლოების შესახებ“ საქართველოს ორგანული კანონის 35¹ მუხლით დადგენილი მახასიათებლების მიხედვით.

„საერთო სასამართლოების შესახებ“ საქართველოს ორგანული კანონის თანახმად, იმის დასადგენად, თუ რამდენად აკმაყოფილებს კანდიდატი ივერი აბაშიძე კეთილსინდისიერების კრიტერიუმს, წინამდებარე დასკვნაში წარმოდგენილი და გაანალიზებულია მისი შეფასება აღნიშნული კრიტერიუმის თითოეულ მახასიათებელთან მიმართებით. კერძოდ, როგორც არის - პიროვნული კეთილსინდისიერება და პროფესიული სინდისი; დამოუკიდებლობა, მიუკერძოებლობა და სამართლიანობა; პიროვნული და პროფესიული ქცევა; პიროვნული და პროფესიული რეპუტაცია და ფინანსური ვალდებულება.

აღსანიშნავია, რომ კეთილსინდისიერების კრიტერიუმით კანდიდატის შეფასება დაეყრდნო მის შესახებ მოძიებულ ინფორმაციას, რა დროსაც სხვადასხვა უწყებიდან გამოთხოვილი იქნა შემდეგი სახის ინფორმაცია: საქართველოს შინაგან საქმეთა სამინისტროდან და თბილისის მუნიციპალიტეტის ტრანსპორტისა და ურბანული განვითარების სააგენტოდან - მონაცემები ადმინისტრაციული სამართალდარღვევების შესახებ; სს „კრედიტინფო საქართველოდან“ - სრული პერსონალური საკრედიტო ინფორმაცია; საქართველოს ფინანსთა სამინისტროს შემოსავლების სამსახურიდან - ცნობა შემოსავლების შესახებ; ანტიკორუფციული ბიუროდან - ქონებრივი მდგომარეობის დეკლარაცია; კანდიდატის სამუშაო ადგილიდან - ინფორმაცია დისციპლინური სამართალწარმოების შესახებ. ივერი აბაშიძის დახასიათების მიზნით, მასთან სამსახურებრივ და პირად ურთიერთობაში მყოფი პირებისაგან მიღებულ იქნა შევსებული სპეციალური ფორმის რეკომენდაციები და კითხვარები. ამასთან,

ივერი აბაშიძის შეფასებისას გათვალისწინებულია მის მიერ განაცხადის შევსებისას მითითებული ინფორმაცია და საჯარო მოსმენის დროს უშუალოდ კანდიდატის მხრიდან გამოვლენილი თვისებები.

პიროვნული კეთილსინდისიერებისა და პროფესიული სინდისის მახასიათებლის მიხედვით შეფასებისას მხედველობაში მივიღე, რომ გამოკითხული პირები და რეკომენდატორები კანდიდატს დადებითად ახასიათებენ. გამოარჩევენ მისი პასუხისმგებლობის მაღალ შეგნებას, თავაზიანობას, თავმდაბლობას, შრომისმოყვარეობას და მითითებებს, რომ კანდიდატი სრულად აკმაყოფილებს კეთილსინდისიერების კრიტერიუმს.

ზემოაღნიშნულ ინფორმაციაზე დაყრდნობით შესაძლებელია დავასკვნათ, რომ ივერი აბაშიძეს გააჩნია პასუხისმგებლობისა და მოვალეობების მაღალი შეგნება და სამსახურებრივ თუ სხვა სახის მოვალეობებს, მათ შორის, ფინანსურ ვალდებულებებს ის ასრულებს ჯეროვნად. ადმინისტრაციული სამართალდარღვევების ჩადენის გამო დაკისრებული ჯარიმებიც ივერი აბაშიძეს გადახდილი აქვს დროულად.

დამოუკიდებლობის, მიუკერძოებლობისა და სამართლიანობის მახასიათებელთან დაკავშირებით რეკომენდატორები და კანდიდატთან კავშირში მყოფი სხვა პირები მას აფასებენ როგორც მიუკერძოებელ და სამართლიან პიროვნებას. აღნიშნავენ, რომ კანდიდატს შეუძლია გადაწყვეტილების დამოუკიდებლად მიღება, მედეგია გარეშე ფაქტორების მიმართ. რაც შეეხება, კანდიდატის პოლიტიკურ ან სხვა ნიშნით მიუკერძოებლობის საკითხს, უნდა აღნიშნოს, რომ ის არცერთი პოლიტიკური პარტიის წევრი, მხარდამჭერი ან/და შემომწირველი იყო და საჯარო მოსმენაზეც მისი მხრიდან არ გამოვლინდა პოლიტიკური ან სხვაგვარი მიკერძოებულობის ნიშნები.

პიროვნული და პროფესიული ქცევის მახასიათებელთან დაკავშირებით აღსანიშნავია, რომ ივერი აბაშიძე თავდაჭერილია და მართავს საკუთარ ემოციებს. კანდიდატის საჯარო მოსმენის შედეგად დამრჩა შთაბეჭდილება, რომ იგი არის მოტივირებული და კორექტული. გავითვალისწინე, რომ კანდიდატის წინააღმდეგ დისციპლინური დევნა ან/და სისხლის-სამართლებრივი წარმოება არ მიმდინარეობს. ამასთან, საქართველოს გენერალური პროკურატურიდან გამოთხოვილი ინფორმაციით დასტურდება, რომ ივერი აბაშიძე დაზარალებულად ცნობილი არ ყოფილა. საქართველოს საერთო სასამართლოებში წარმოებულ დავებში კანდიდატის მხარედ მონაწილეობის თაობაზე საქმისწარმოების ელექტრონული სამიგბო სისტემის მეშვეობით მოძიებულ იქნა ერთი სამოქალაქო საქმე, სადაც მოსარჩელე მხარე ივერი აბაშიძეა, დავის საგანი - უზრუნველყოფა სარჩელის აღძვრამდე; ბათუმის საქალაქო სასამართლოს 2021 წლის 31 დეკემბრის განჩინებით განცხადება დაკმაყოფილდა.

პიროვნული და პროფესიული რეპუტაციის მახასიათებლის მიხედვით კანდიდატის პიროვნულ თვისებებს, ისევე როგორც მის პროფესიულ მიღწევებს, რეკომენდატორები და გამოკითხული პირები აფასებენ დადებითად. ამასთან, საქართველოს იუსტიციის უმაღლესი საბჭოს საზოგადოებასთან და მედიასთან ურთიერთობის სამსახურის მიერ მოწოდებული ინფორმაციის თანახმად, ივერი აბაშიძის შესახებ ინტერნეტ სივრცეში ხელმისაწვდომია ინფორმაცია მის მოსამართლედ განწესებასთან, სამოსამართლო საქმიანობასთან და საქართველოს უზენაესი სასამართლოს მოსამართლის შესარჩევ კონკურსში მონაწილეობასთან დაკავშირებით.

ფინანსური ვალდებულების მახასიათებელთან დაკავშირებით შესაძლებელია ითქვას, რომ ივერი აბაშიძე ჯეროვნად და კეთილსინდისიერად ასრულებს ფინანსურ ვალდებულებებს.

მას აქვს მიმდინარე სესხები დადებითი საკრედიტო ისტორიით, სახელმწიფო ბიუჯეტის მიმართ დავალიანება არ ერიცხება და მეწარმეთა და არასამეწარმეო იურიდიულ პირთა რეესტრში რეგისტრირებული არ არის. ამრიგად, კანდიდატის ფინანსური ვალდებულებების შემოწმების შედეგად გამოიკვეთა, რომ არ არსებობს მისი ქონებრივი ინტერესების მართლმსაჯულების ინტერესებთან დაპირისპირების საფუძველი, რამაც შესაძლოა შემდგომში საფრთხის ქვეშ დააყენოს მოსამართლის მიუკერძოებლობა.

ყოველივე ზემოაღნიშნულის და თითოეული მახასიათებლის გაანალიზების შედეგად, ვინაიდან არ გამოიკვეთა გარემოება, რაც ეჭვქვეშ დააყენებდა კანდიდატის კეთილსინდისიერების საკითხს, კანდიდატი კეთილსინდისიერების კრიტერიუმის ხუთივე მახასიათებლით შემოწმებისას შევავასე სრულად დადებითად და მიმაჩნია, რომ „საერთო სასამართლოების შესახებ“ საქართველოს ორგანული კანონის 35¹ მუხლის მე-15 პუნქტის „გ“ ქვეპუნქტის შესაბამისად, ივერი აბაშიძე სრულად აკმაყოფილებს კეთილსინდისიერების კრიტერიუმს.

2. კანდიდატის შეფასება კომპეტენტურობის კრიტერიუმის მახასიათებლების მიხედვით:

კომპეტენტურობის კრიტერიუმის მიხედვით კანდიდატი, როგორც მოქმედი მოსამართლე, შეფასდა „საერთო სასამართლოების შესახებ“ საქართველოს ორგანული კანონის 35¹ მუხლის მე-17 პუნქტით დადგენილი წესით. კერძოდ,

ორგანული კანონის თანახმად, კომპეტენტურობის კრიტერიუმის საფუძველზე ივერი აბაშიძის შეფასებისას მხედველობაში იქნა მიღებული აღნიშნული კრიტერიუმის თითოეული მახასიათებელი, კერძოდ, როგორც არის: სამართლებრივი ნორმების ცოდნა; სამართლებრივი დასაბუთების უნარი და კომპეტენცია; წერის უნარი; ზეპირი კომუნიკაციის უნარი; პროფესიული თვისებები, მათ შორის, - ქცევა სასამართლო დარბაზში; აკადემიური მიღწევები და პროფესიული წვრთნა, პროფესიული აქტივობა. აღსანიშნავია, რომ კომპეტენტურობის კრიტერიუმით კანდიდატის შეფასება დაეყრდნო კანდიდატის შესახებ მოძიებულ ინფორმაციას, მის მიერ წარმოდგენილი გადაწყვეტილებების შესწავლით მიღებულ ინფორმაციასა და საჯარო მოსმენის შედეგად შექმნილ შთაბეჭდილებას.

სამართლებრივი ნორმების ცოდნის მახასიათებელის მიხედვით კანდიდატის შეფასებისას გავითვალისწინე საჯარო მოსმენის დროს მის მიერ გამოვლენილი მატერიალური და საპროცესო კანონმდებლობისა და ადამიანის უფლებების სამართლის ცოდნის დონე და, აგრეთვე, მხედველობაში მივიღე მის მიერ გამოტანილ გადაწყვეტილებებში შესაბამისი სამართლის ნორმების გამოყენების სისწორე.

ივერი აბაშიძის საჯარო მოსმენა იუსტიციის უმაღლეს საბჭოში გაიმართა 2025 წლის 5 ივნისს, რა დროსაც საბჭოს წევრებმა მას დაუსვეს არაერთი ზოგადი და კონკრეტული სამართლებრივი ხასიათის შეკითხვა. შეფასების პროცესში ასევე შესწავლილ იქნა ივერი აბაშიძის მიერ განხილულ საქმეებზე წარმოდგენილი გადაწყვეტილებები: თბილისის საქალაქო სასამართლოს სამოქალაქო საქმეთა კოლეგიის 2023 წლის 30 მარტის N2/39558-22 და 2022 წლის 29 სექტემბრის N2/17114-22 29 გადაწყვეტილებები.

კანდიდატის მიერ წარმოდგენილი გადაწყვეტილებების შესწავლისა და საჯარო მოსმენის შედეგად შემიძლია დავასკვნა, რომ ივერი აბაშიძე კარგად ფლობს როგორც მატერიალურ, ისე საპროცესო სამართლის თეორიულ საფუძვლებს. გასაუბრებისას დასმულ შეკითხვებზე მისი პასუხები ძირითადად იყო ვრცელი და არგუმენტირებული, რა დროსაც იშველიებდა

საკუთარ პრაქტიკულ გამოცდილებას. უნდა აღინიშნოს, რომ ივერი აბაშიძეს გააჩნია მოსამართლედ მუშაობის შვიდ წელზე მეტი ხნის გამოცდილება და სამოსამართლო უფლებამოსილებას ახორციელებდა როგორც სამოქალაქო, ისე ადმინისტრაციულ საქმეთა კოლეგიაში.

კანდიდატის სამართლებრივი დასაბუთების უნართან და კომპეტენციასთან დაკავშირებით კიდევ ერთხელ უნდა აღინიშნოს, რომ მას აქვს სამოქალაქო და ადმინისტრაციულ საქმეთა კოლეგიებში მოსამართლედ მუშაობის საკმაოდ ხანგრძლივი გამოცდილება. მიმაჩნია, რომ კანდიდატის მიერ ჩამოყალიბებული მოსაზრებები, ფაქტობრივი და სამართლებრივი თვალსაზრისით, არგუმენტირებული და დასაბუთებულია. გასაუბრებისას მისი პასუხები იყო კვალიფიციური და თანმიმდევრული.

კანდიდატის **წერის უნარის** შეფასებისას გავითვალისწინე ივერი აბაშიძის მიერ საქმეთა განხილვის შედეგად მიღებული გადაწყვეტილებები, რითაც დასტურდება, რომ გამოირჩევა სათანადო წერის უნარით. მის მიერ წარმოდგენილი გადაწყვეტილებები შედგენილია მარტივი და გასაგები ენით. კანდიდატი კარგად იყენებს და აანალიზებს სამართლებრივ ნორმებს. დასაბუთებისას გამოყენებული აქვს საქართველოს უზენაესი სასამართლოს განმარტებები. ამასთან, შესწავლილ დოკუმენტებში თვალსაჩინო და გრამატიკული ხასიათის შეცდომა არ გამოვლენილა.

ზეპირი კომუნიკაციის უნართან დაკავშირებით უნდა აღინიშნოს, რომ ივერი აბაშიძე გამოირჩევა გამართული მეტყველების უნარითა და სხვისი აზრის მოთმინებით მოსმენის თვისებით. კანდიდატმა საჯარო მოსმენაზე თანმიმდევრულად, ნათლად და ლოგიკურად გადმოსცა საკუთარი აზრი.

პროფესიული თვისებების, მათ შორის, სასამართლო დარბაზში ქცევასთან დაკავშირებით შეიძლება ითქვას, რომ ივერი აბაშიძე მიზანდასახული, პრინციპული, საქმისადმი ერთგული, ემოციურად გაწონასწორებული, კეთილსინდისიერი, თავშეკავებული პიროვნებაა. აღსანიშნავია, საქმეთა განხილვის თაობაზე მოწოდებული სტატისტიკური ინფორმაცია, რომლის თანახმად, კანდიდატს საქმის განხილვის საპროცესო ვადები დაცული აქვს საქმეთა 94,3% შემთხვევაში, ასევე, საქმეთა 100% შემთხვევაში დაცული აქვს გადაწყვეტილების მომზადების საპროცესო ვადები. მის მიერ გამოტანილი გადაწყვეტილებები, ზემდგომ სასამართლოში გასაჩივრების შემდეგ, უცვლელი დარჩა საქმეთა 83,6% შემთხვევაში. კანდიდატს საანგარიშო პერიოდში (958 დღეში) დასრულებული აქვს 253 საქმე (დღეში საშუალოდ 0,2 საქმე).

ამასთანავე, არ არსებობს კანდიდატის მიმართ დისციპლინური წარმოების დაწყების შესახებ რაიმე ინფორმაცია.

შესაბამისად მიმაჩნია, რომ ივერი აბაშიძე სამოსამართლო უფლებამოსილებას ასრულებს წარმატებით და კეთილსინდისიერად.

აკადემიური მიღწევებისა და პროფესიული წვრთნის მახასიათებლით კანდიდატის დახასიათებისას გასათვალისწინებელია, რომ ივერი აბაშიძეს აქვს თვითგანვითარების, ახალი ცოდნისა და უნარების შეძენის ინტერესი, მიღებულ ცოდნას კი ის წარმატებით იყენებს პრაქტიკაში. ივერი აბაშიძეს ჩაბარებული აქვს მოსამართლეობის საკვალიფიკაციო გამოცდა, სამოქალაქო და ადმინისტრაციული სამართლის სპეციალიზაციით, ასევე ჩაბარებული აქვს ადვოკატთა საკვალიფიკაციო გამოცდა სამოქალაქო სამართლის სპეციალიზაციით.

კანდიდატი აქტიურად მონაწილეობს სამართლებრივი სისტემისა და მართლმსაჯულების საკითხებზე გამართულ სამუშაო შეხვედრებსა და სემინარებში. ამასთან, კანდიდატი იყო საქართველოს იუსტიციის უმაღლესი სკოლის მსმენელი.

პროფესიული აქტივობის შესახებ შეიძლება ითქვას, რომ ივერი აბაშიძე აქტიურად მონაწილეობს მართლმსაჯულების საკითხებზე გამართულ სხვადასხვა ღონისძიებაში.

კერძოდ, ივერი აბაშიძემ მონაწილეობა მიიღო შემდეგ ღონისძიებებში: 2023 წლის 31 მარტი - 2 აპრილი, ახალციხე (სასტუმრო „რაბათი ჯინო ველნესი“), ევროპის საბჭოს ოფისთან (CoE) თანამშრომლობით ევროპის სოციალურ ქარტიასთან დაკავშირებით მოსამართლეებისათვის დაგეგმილი სემინარი; 2023 წლის 28-30 ივნისი, კომპლექსი „ლოპოტა“, სამოქალაქო და ადმინისტრაციული სამართლის მნიშვნელოვან და აქტუალურ საკითხებთან დაკავშირებით დაგეგმილი სამუშაო შეხვედრა და სხვა.

საქართველოს მოსამართლეთა კონფერენციის მიერ, 2019 წლის 5 ოქტომბერს და 2022 წლის 23 ოქტომბერს, ივერი აბაშიძე არჩეულ იქნა საქართველოს მოსამართლეთა ასოციაციის გამგეობის წევრად.

ამდენად, **კომპეტენტურობის კრიტერიუმის** თითოეულ მახასიათებელთან მიმართებით კანდიდატის შეფასებისას გათვალისწინებულ იქნა მისი ცოდნა, კომპეტენცია, გამოცდილება, პროფესიული თვისებები, უნარ-ჩვევები და სხვა მნიშვნელოვანი მახასიათებლები. ასეთი ინფორმაციის შეჯერებისა და შეფასების საფუძველზე კი დადგინდა, რომ **ივერი აბაშიძის** მიერ დაგროვილ ქულათა ჯამი მაქსიმალური 100 ქულიდან შეადგენს 90 ქულას.

შემფასებელი:

ნიკოლოზ მარსაგიშვილი
თარიღი: 27.06.2025